

techio per andar verso Po etc. De i nimici, non è mossi; sono al loco solito. Scrive *etiam* che el signor Theodoro Triulzi, consultato con li provedadori zenerali, è di questo tenor, et li provedadori zenerali scriseno in consonantia. A Verona non fanno altro che fortificar la terra.

Da poi disnar, fo Gran Consejo per trovar danari, et fu el Principe. Et prima, per molti disordini che si vede a Gran Consejo in star in piedi, trar balote, star al tribunal et altro, fo leto, per il Canzelior Grando, una parte presa 1494, a dì 14 Novembrio, nel Consejo di X, contra queste cose molto longa et assae ordeni, e poi admoniti tutti a osservarla, *aliter* sarà exequida contra di loro.

Et chiamati li banchi a capello, in ultima sier Zuan Batista Lion qu. sier Nicolò, desideroso andar in eletion, andò al capelo de mezo e tocò balofa d'oro e andò suso senza aver tocà nel primo capelo, che zà el Consier era levato; *unde* visto questo et che erano 10 in eletion, fo publicà dito sier Zuan Batista cazuto a la leze, privo per mesi 6 dil Consejo, et fo *statim* mandato zoso.

Fu posto, per li Consieri, licentia a sier Almorò Barbaro podestà di Castelfranco, amalato, possi venir in questa terra, lasando in loco suo sier . . . , e fu presa. Ave

Fo leto *lettere di Crema, qual vene di 22, 23 et 24, di sier Bortolameo Contarini capitano e provedador, in zifra*, ma una *postscripta* diceva cussi, qual per il Canzelior Grando fo leta a contento de tutti. *Postscripta*. Ho auto aviso Novara e Pavia esser date al Christianissimo Re, et che sguizari fuzivano verso il suo paese. È stà dito *etiam* che l'exercito dil Christianissimo Re feva uno ponte sora Po, et ch'el borgo di Milan di Porta Romana questa note havia eridato «Franza»; sichè fin do o tre zorni si tien il Christianissimo Re sarà in Milan; e di tutto aviserà. Le zente pontificie erano cavalcate verso Castel San Zuane, sono ritornate a Piasenza.

347 Et le altre lettere di 22 et 23, non fo lete ma ben trate di zifra. Erano in brevi, et lecte con li Savii, dice ch'el signor capitano di le fantarie, come scrisse, volendo andar a la impresa di Lodi, si era dispalato, et che *tamen* toriano la dita impresa, lasando, per adesso, de tuor quella di Cremona, perche questa sarà più facile. Avisa alcune cose di nove di francesi et sguizari, sicome si à auto di Roma.

Fo fato ozi eletion e tolto do zoveni podestà a Piove di Saco: sier Zuan Francesco Balbi di sier

Piero, sier Zuan Batista Grimani, che servi a Padoa e in campo con homeni 9 e cavali 3, qu. sier Domenego, el qual Grimani andò prima a oferir ducati 100 inprestado; il Balbi oferse ducati 150. *Iterum* il Grimani oferì ducati 100, e il Balbi altri ducati 100, et balotadi, il Balbi rimase, che prestò ducati 50 più; sichè non si varda più stato in custodia, ni altro; sichè di Piove di Saco si trovò ducati 450. Auditor vechio niun prestò danari, et niun non passò Provedador sora le camere; sier Fantin Corner qu. sier Hironimo da la Piscopia, di età di anni . . . , tolto, prestò ducati 1500 et rimase. A la camera di Imprestedi, tolli 4, do prestò: sier Francesco Bon qu. sier Scipion stato tre anni prison a Ferrara, prestò ducati 200, oltra ducati 50 prestati ullimamente, et sier Alvise Foscarini qu. sier Marco, prestò ducati 400, e lui rimase. Poi, quelli tolli di Pregadi si andono a oferir, come dirò di soto, et veneno tripli e quadrupli, perche quasi niun con titolo si fa tuor di Pregadi; e li eletionarii voleno chi impresta, che altri non voleno esser tolli per eazer, et rimase quelli che ozi oferse prestar. Fo tolli altri, quali voleano prestar; ma visto queste poste grosse, restono di andar a oferir e oferirano un altro Consejo; sichè quelli impresta più, à più balote et riman. Et qui avanti notarò chi rimase et inprestò; ma è una cosa di più importantia in Gran Consejo.

Questi prestono ozi a Gran Consejo.

347*

Sier Zuan Baptista Grimani qu. sier Domenego, electo a Piove di Saco, si vene a oferir prestar	ducati	100
Sier Zuan Francesco Balbi di sier Piero	»	150
Sier Zuan Batista Grimani ancora	»	100
Sier Zuan Francesco Balbi ancora	»	100
Sier Fantin Corner qu. sier Hironimo da la Piscopia, electo provedador sora le camere	»	1500
Sier Francesco Bon qu. sier Scipion, electo a la camera d'imprestedi	»	200
Sier Alvise Foscarini qu. sier Marco, electo <i>ut supra</i>	»	400

Da poi stridati li tolli di Pregadi,

Sier Pangrati Dolfin qu. sier Dolfin, oltra angarie e inprestedi	ducati	700
Sier Polo Malipiero qu. sier Giacomo	»	800